

20 FEBRUARI 2018

Sorok 52.8kg syabu dalam tong ais

KOSMO! SELASA 20 FEBRUARI 2018

NEGARA! 13

Polis berkas lapan ahli sindiket termasuk tiga wanita tempatan

Sorok 52.8kg syabu dalam tong ais

Oleh ATIKAH DALI

MELAKA – Sebanyak 52.8 kilogram (kg) dadah jenis syabu yang dibalut dengan bungkus teh dan disorokkan di dalam tong ais dirampas dalam serbuan di sebuah rumah sewa di Malim dekat sini baru-baru ini.

Dalam operasi selama 16 jam bermula pukul 2.30 pagi itu, polis turut menahan lapan individu warga tempatan termasuk tiga wanita berusia 20 hingga 31 tahun di dua lokasi berasingan di Malim.

Ketua Jabatan Siasatan Jenayah Narkotik (JSJN) Bukit Aman, Datuk Seri Mohamad Salleh berkata, turut dirampas ialah dadah jenis ketamin, pil ekstasi, dua buah kereta, motosikal, wang tunai dan sejumlah barang kemas.

“Berdasarkan siasatan awal, rampasan dadah bernilai RM3.7 juta itu adalah yang terbesar di Melaka setakat ini.

“Kesemua bahan terlarang itu dipercayai untuk edaran dan kegunaan di

sekitar negeri ini selain dieksport ke negara jiran,” katanya pada sidang akhbar di Ibu Pejabat Polis Kontinjen (IPK) Melaka di sini semalam.

Turut hadir Timbalan Ketua JSJN Bukit Aman, Datuk Kang Chez Chiang dan Ketua Polis negeri, Datuk Abdul Jalil Hasaan.

Menurut Mohamad, sebanyak 52.8kg dadah yang bernilai RM70,000 setiap kg itu boleh menampung permintaan seramai 260,000 penagih dadah.

Jelas beliau, ujian air kencing menunjukkan empat daripada yang ditahan positif dadah selain memiliki rekod jenayah termasuk kesalahan dadah.

“Setakat ini kita masih menyiasat beberapa lama kegiatan tersebut dijalankan. Kesemua mereka kini direman selama seminggu bagi membantu siasatan,” katanya.

Kes disiasat mengikut Seksyen 39B Akta Dadah Berbahaya 1952 yang memperuntukkan hukuman mati mandatori jika sabit kesalahan.



MOHAMMAD (tiga dari kanan) bersama Chez Chiang (empat dari kanan) dan Abdul Jalil (dua dari kiri) menunjukkan bungkus dadah yang dirampas pada sidang akhbar di IPK Melaka semalam.